

八指頭陀詩集

入指頭陀詩續集卷六

釋敬安寄禪

寄太史李梅痴觀察江南

丙午

記從黃歇浦爲別至於今每讀梅花賦

公會以所著白梅賦題余白梅

詩卷如逢李翰林江南春草暮海上碧雲陰吳越千山隔  
迢遙寄苦吟

朱鞠尊俞恪士二觀察皆余湘社中人今朱官江

甯鹽道俞爲江南陸師學堂監督舍弟子成流

落江淮不得不望二公一爲援手因各寄五言

古詩一章述其艱苦俾得升斗之惠以療其飢

云

湛湛昭潭水，峩峩麓山雲。與公相識來廿載，如一晨。今有迫切懷，請爲公一陳。敬也誠薄劣，我生實不辰。幼小失怙恃，托足於空門。有弟長乖違，乞食恒依人。平生不得意，垂老轉艱辛。馳驅計一歲，溫飽能幾旬。况有失乳兒，嗷嗷待哺頻。儻皆凍餓死，宗祀永斬焉。念此痛中腸，觀空亦難冥。追憶疇昔遊，惟公據要津。願施升斗水，活彼涸轍鱗。但使沾微利，亦足感深仁。引領望江南，奉書涕漣漣。悽惻骨肉情，諒蒙公見憐。

右寄朱鹽道

我公性仁慈，宿懷濟物情。今我有苦衷，訴公公其聽。我

之同胞弟姓黃名子成幼孤早廢讀貧無薄田耕飢驅  
走四方久客困金陵衣食恒不給東餓迫頽齡其妻病  
已歿暴骸於榛荆遺下兩男女嗷嗷猶待乳念此骨肉  
殘不覺淚如雨悽悽復悽悽舍弟望提攜瓊林千萬樹  
聊借一枝棲全家得溫飽不使生別離感激亦何報啣  
結以相貽

右寄俞觀察

### 懷江南友人四絕句

雲海離襟老不堪夢痕和月墮江南晨鐘欲動春山曙  
苦憶詩人饒十三

詩人清興在春時把酒看花處處宜正是秦淮煙景好

落梅如雪雨如絲

右懷饒十三舍人

迢迢雙鯉一封書  
細雨如絲二月初  
爲問江南陳吏部  
春懷着酒近何如

泠泠仙骨冷於霜  
嬾踏紅雲謁玉皇  
今日人天爭啟請  
老僧應可下胡床

右懷陳伯嚴吏部

余別吳雁舟太守十三年矣  
丙午春公由日本還國  
遇於滬上感時話舊悲欣交集  
因爲七律一章贈之

長沙一別十三春  
白首相逢倍苦辛  
時事能令志士懼  
高談轉使俗儒嗔  
我雖學佛未忘世  
公乃悲天更憫人

各抱沉憂向滄海茫茫雲水浩無垠

與友人游張園感而有作

滿地蒼紅盡綺塵繁華隊裏獨沾巾  
傷心蒿目此何世  
嘗膽卧薪甯有人  
商女琵琶還度曲  
王孫芳草尙迷春  
却憐黃浦江頭月  
猶照滄桑劫後身

奉酬陳哲甫觀察

曾向扶桑浴日回  
皇華六載久追陪

公會爲日  
本參贊

倭人爭

寶孟公札海客猶稱漢使才  
萬國煙塵虛涕淚九州人

物漫疑猜

公以辦黔南礦  
務橫被口語

浮雲世事何須論  
白社蓮花

待汝開

丙午仲春陳哲甫觀察招高邕之吳雁舟狄楚青  
狄南士陳子言及余於一粟庵午齋觀察出黔  
南探井圖索題因作七古一章應之

車塵馬迹不到處乃有城中一粟庵長者於茲具香飯  
老禪亦忝陪清談花鳥無心人自笑筍蒲有味余猶貪  
畫圖絕妙意誰識雲煙恍惚身曾探黔山咫尺落吾手  
覓句不得心懷慚還公此卷三歎息焚香合掌重和南  
斯游或勝虎溪樂吟嘯何止人兩三霞外襟期倘不棄  
文殊摩詰當同龕

前作意猶未竟再題五律一首

伊余味禪寂恨未入林深不識金銀氣惟餘山水心披  
雲悵孤往把卷一長吟便欲從君去縋幽曠我襟

余既晤雁舟太守同游數日公仍之黔余亦還甬  
爲詩二章以贈其別

劫火灰餘草不薰天涯猶得一逢君共聽黃浦江頭雨

憶踏朱陵洞口雲

曩同游南嶽有  
嶽游唱和集

日月幾何人已老江

山萬里首重分碧波春水情無限攜手殷勤話夕曛

平生第一賞心人論道論詩兩絕倫最苦白頭還惜別  
可堪滄海正揚塵鶯花一濺憂時淚香火甯留供佛因  
此後相逢又何日水雲渺渺獨傷神



三月初四印懣和尚由金陵寄書報子成弟病歿  
於毘盧寺爲詩哭之

松關微月黯無光  
印上人書報汝亡  
翻悔平時多切責  
遂令此痛更難忘  
生前喪婦頭先白  
死後遺孤口尙黃  
兄弟之情吾已愧  
空山徒有淚千行

登潤州玉山超岸寺

正得江山勝金焦  
左右浮南徐  
青背郭北固  
翠橫樓聽梵  
魚龍靜安禪  
水月幽登臨  
無限意甯爲看山留

泛月至焦山追懷芥長老

圓月出青霄  
扁舟渡晚潮  
樓臺靄煙霧  
燈火辨漁樵  
滄

海雖多變青山尙姓焦  
芥公何處覓鐘梵夜飄蕭

重遊金山次文待詔金山圖原韻二首

并序

光緒紀元余住金山曾侍大定老人巾拂今退  
院常靜秋巖二長老彼時俱充首領忽忽三十  
年矣丙午暮春余由天童將之淮上重登是山  
則老人已八十三歲余與常秋俱鬚髮蒼然成  
老僧也追懷舊事不禁潸然堂頭印開和尚出  
文待詔金山圖索題因次其原韻二首以志今  
昔之感云

三十年前此地游  
參差殿閣倚中流  
沙痕漸沒濤頭岸

海氣寒生江上樓  
人世滄桑雙鬢老  
往來雲水一身浮  
名山再到仍無恙  
北固青青出潤州

驚濤如碓古今春  
六代豪華轉瞬空  
郭璞墳荒亂石裏  
靳王廟冷夕陽中  
風帆片片過前浦  
雲樹森森擁梵宮  
萬古興亡俱莫問  
且聽漁笛起江東

暮春由越之淮過揚子江望金焦有作

忽忽江湖白髮新  
海天愁思欲沾巾  
楊花一片隨流水  
揚子江頭又送春

欲向金焦訪舊遊  
海門月黑阻行舟  
春風吹袂渡淮水  
何處青山是越州

四月天童道中卽事

山翠浮空瀑濺裳  
桐花未落棗花香  
籃輿緩打雲邊過  
稍聽溪禽啼夕陽

暮春還山

離山幾日徑都荒  
溪溜成池樹老蒼  
記得出門春尙淺  
歸來新笋過人長

過徐山人溪居納涼

愛此茅茨夏日幽  
左松右竹映清流  
菱花雨過魚穿鏡  
楊柳風斜燕入樓  
二水白爭趨堰口  
四山青約赴簷頭  
主人疏冷頗好道  
澹對忘言似野鷗

以山中幽勝誇示陸桂亭明府

萬樹寒松鎖翠微  
淡然心地久忘機  
山光照檻綠侵座  
雲氣纏身白滿衣  
月黑村前山鬼嘯  
雨昏潭上毒龍歸  
請君留此度長夏  
共聽蟬聲送夕暉

山居遣興次愛蓮居士原韻

安禪不避毒龍毒  
特解空山虎門來  
雲氣曉生游客屐  
雨花時落講經臺  
千莖白髮催人老  
萬樹青松爲鶴栽  
且喜世間緣慮淨  
海鷗何事更相猜

淨土詩仍次前韻

龍行雨過月如鏡  
淨土分明入夢來  
池上雙巢金翡翠

波中倒浸玉樓臺蓮花出水湛然潔寶樹成行不假栽  
欲往西方安樂國須憑信力斷疑猜

再呈桂亭明府次前韻

風泉竹韻夜微微靜聽泠然自息機萬壑煙嵐浮佛髻  
諸天花雨落禪衣雲生絕巘無人到月滿蒼松有鶴歸  
一卷金經看未罷又聞鐘磬動斜暉

陳海瓢茂才入山以詩見贈賦此奉酬

偶識陳無已高談氣吐虹雲煙生筆底天地入詩中

君

詩兼善書畫

喜結竹林契

時偕其姪入山

同追蓮社風憐君題好句

應得碧紗籠

重至金陵毘盧寺陳伯嚴吏部步月見顧話及亡

弟子成淒然賦此

三年重到石頭城野寺蕭寒百感生  
衰鬢更逾前度白佛燈猶照夜禪明  
看雲憶弟人何在步月逢君淚卽傾  
一漾清涼舊山色春風悽斷鶉鴒聲

賀師旦來山賦詩次韻以荅

山人山裏住住久遂忘山雲氣生衣上  
泉聲來竹間幽花解禪意瘦石肖僧顏  
苦被詩魔擾沉吟殊未閒

覺道同參於普陀深處結茅庵安禪  
丙午六月余

渡海相訪喜巖壑之勝作此贈之

踏破芒屨早放參海山深處結茅庵白雲倚岫意俱遠  
赤日當天睡尙酣水月禪心君已悟煙波興致我能諳  
會須來卓林間錫彌勒何妨共一龕

訪鄞邑令高子勛明府不值

箬笠遙相訪晴雲作曉霞高枝無鬥雀野水有鳴蛙海  
近潮來急官清吏不譁輕車何處去閒煞一城花

雨後明州郡齋與喻庶三太守坐談宗乘忻然有  
作

一雨郡齋涼煩暄忽已忘與公談淨理還似在清湘高  
柳搖疎影秋花生晚香上方歸路近鐘磬動斜陽



秋日懷吳夢舟長沙

芙蓉落曉霜忽覺海波涼昨夢洞庭月歸浮湘水航夫  
君不可見而我意難忘楚越五千里迢遙空夕陽

遯翁易笏山信天翁陳六笙兩先生年皆八十一  
俱以藩司乞休易則僑寓九江陳則寄居西湖  
俱以今秋物故方悲悼間忽聞江南顧石公亦  
於三月醉死烏龍潭上余與三公忝有文字緣  
爰各以一絕句挽之

欲把芙蓉訪玉京九江遙望海雲生遯翁仙去匡山老  
九疊屏風空月明

遯翁喜談丹訣

八十一翁西蜀還可憐  
白髮尙紅顏吟殘西子湖中月  
化鶴應歸海上山

我愛江南顧石公  
苦吟終日坐松風  
大瓢一醉龍潭月  
便與劉伶荷鍤同

滬上晤鄭蘇堪京卿作此奉贈

舉世正炎燠斯人心獨涼  
高懷吞海月吟鬢閱邊霜  
眾鳥方爭啄孤雲竟自翔  
無窮家國事歷歷話滄桑

次韻答鄭蘇堪京卿七古二首

剎那剎那世遷移纔覺新  
詩俄已舊了知三際不可得  
去無前古來無後覺皇邈矣復何言  
此理久爲人詈詬

嗟余學道老無成捨身祇堪飼猛獸開堂豎拂空爾爲  
般若真燈誰乞授明朝別君還甬東安禪欲更尋雲寶

其二

道人觀世如浮雲何者爲新何者舊故應病膏發狂華  
妄見生前與身後誓將平等齊冤親豈喜佛讚嘆魔詬  
帝釋螻蟻同一塵天人甯異於鳥獸但嗟神理今欲絕  
大千寥寥誰可授不如冥坐默無言一任天花滿巖竇  
須菩提宴坐巖中默然無言天  
帝釋往散花歎其善說般若

附鄭京卿原韻

頭陀畜鬚有時名交遊一世多耆舊手持詩卷使我

讀汲汲似欲傳身後向謂我癡子更癡癡而又貪佛  
所詬我今瞢騰混世塵奚殊同羣於鳥獸古人妙處  
皆已死糟粕安用私傳授待我斬絕煩惱緣披髮相  
從入雪竇

八月五日海藏樓主人招余及陳布衣奉陪朱侍  
郎晚齋賦此敬謝

主人味禪悅招我日初殘筇竹引涼步秋盤潔晚餐笑  
言塵刹幻如對海山寒忝與勝流集清芬挹杜蘭

朱疆邨侍郎以詞集見貽賦此奉酬

疆邨老詞客貽我碧雲章展讀坐高閣含情對夕陽幽

泉寒漱玉老鶴夜鳴霜持此比高調余懷殊未央

八月二十二日陳鶴柴居士邀余及俞恪士吳蓉

初兩觀察飯於滬上某氏園卽送恪公北上

好道陳居士邀余就晚齋况逢今雨好

時陳哲甫亦至

復與故

人偕

俞吳皆余湘中故友

高館成良會秋風動別懷江干一揮手

寂寞返雲崖

次世退庵廉訪九日偕友人登太白山出示五律

### 四章次韻奉答

使君幽興發小隊出郊行野寺尋秋至山僧掃葉迎祇  
嫌松鶴唳來雜草蟲聲應愛龍潭水出山無此清

佳節愛重九相攜此地游天清羣籟息竹密細泉流紅  
葉經霜艷黃花過雨秋夕陽山更好望遠且登樓  
喜陪高士語彌愜出塵襟坐覺碧山暮因談淨理深千  
峰含暝色一磬定禪心隔斷人間路松關積翠沈  
登高一微咏幽谷盡傳聲五字真無敵諸峰相與清霜  
寒楓更落雲淨月初生却視長庚笑茲山浪得名

劉貞女覺解優婆夷讚

猗歟劉貞女覺解優婆夷不字葆童真奉佛報母慈蓮  
花出綠波天然絕塵姿慧根固夙植妙行亦善持閭浮  
偶謫墜安養終當歸佛光燦皎皎天樂遠微微高誕華

池淨長與胎獄辭浮漚雖已滅神理恒若斯清芬誰爲  
宣援筆廣此詞

江北水災一首

客從徐州來未言淚先垂江淮今歲災迥異往昔時一  
自海禁弛米貴等珠璣窮簷那得飯持豆以作糜還期  
秋稼熟猶可遂其私豈知六七月大水淹沒之廬舍旣  
漂蕩農具罕見遺死者隨波濤生者何所棲相攜走泥  
瀋路滑行步遲飢來欲乞食四顧無人炊兒乳母懷中  
母病抱兒嘔倉卒骨肉恩生死終乖離不如賣兒去療  
此須臾饑男兒三斗穀女兒五千貲幾日糧又絕中腸

如鳴雷霜落百草枯風凋木葉稀掘草草無根剝樹樹  
無皮飢嚙衣中棉棉盡寒無衣凍餓死路隅無人收其  
屍傷心那忍見人瘦狗獨肥哀哉江北民何辜罹此災

乞端午樵尙書經幢奉呈二十四韻

丁未

擾攘遭艱運安危倚大臣遠猷扶社稷宿抱奮經綸去  
思碑遺楚來蘇歌動秦重溟問殊俗絕域駐征輪使節  
回滄海天書下紫宸南邦還舊治北固挹清塵膏  
雨蘇凋瘵橫流扼要津論文忻得士經武正談兵淮海  
災千里存亡繫一人不眠憂反側嘗餅味酸辛

公取嘗  
災民豆

餅分啖  
僚屬

慷慨發棠急迢遙轉粟頻那堪哀赤子忽報起



黃巾飛檄平江右，驚濤靖海濱。功成翻殞涕，算秘欲通神。  
攬勝窮巖壑，怡情洽隱淪。看雲心更遠，嗜古意逾新。  
野衲忘衰朽，幽居得素貧。金峩騰作杖，雪竇近爲鄰。  
澗草軟承屐，巖花細吐茵。難持綺語戒，空老苦吟身。  
朱紱敢輕謁，白鷗聊自馴。經幢如可乞，玉帶復何珍。  
法苑留佳話，名山結淨因。鄴侯調鼎日，應許嬾殘親。

午樵尙書屬題石鼓文榻本

衡山吾舊住，曾涉嶺巔蚪。蚪照赤石鸞，鳳翔蒼烟斯。  
文紀方叔禘，武歌周宣願。公匡

聖主，頌中興年。

余小住毘盧寺時李茹真大令自海州歸以二鶴  
相貽忽一鶴爲野犬所斃一鶴隨余還天童亦  
哀鳴不食而死余瘞之松下誄之以詩

故人新自海州歸二鶴相貽近錫飛羽族忘機應不死  
雲霄失侶遂無依哀鳴竟爾聲俱邈感事因之淚亦揮  
瘞汝松根還作諫千秋華表事依稀

題趙仲青二尹詩集五截句

如此清才復幾人蕭然一室久忘貧厨空不借鄰家米  
二尹高風自絕倫

一卷琳琅手自裝身閒却爲賦詩忙殘年絕粒茅簷下

猶對梅花嚼冷香

倩我題詩久未曾料因怪煞老禪僧拈毫欲了多年債  
大雪漫山硯已冰

十年薄宦甬江邊山水多留文字緣何用豐干強饒舌  
新詩句句自堪傳

君家漢水楚江頭海內爭稱趙倚樓黃鶴高飛誰可近  
白雲遙望思悠悠

題趙仲青二尹神交集六首

並序

趙仲青二尹需次明州因閱報紙與白門鄭寄  
伯通州張峽亭兩茂才競以詩唱酬氣味相投

遂訂爲金蘭之契各選詩數十首合刻名曰神  
交集索余題詞回憶壬辰夏鄭湛侯宰衡陽時  
君掌記室會隨湛老及其三公子叔獻孝廉赴  
余羅漢寺齋今鄭氏父子俱已下世光陰流電  
余與君皆老矣因題六截句以志今昔之感云  
雲壓枯松倒寺門萬峯寒逼一燈溫攤開詩卷焚香坐  
猶認高張舊夢痕

白門高詛薄層雲張拙清才亦不羣

張拙唐時名秀才  
善詩醉心佛理

等是江南好風格未曾識面已知君

惟憑文字訂心知千里言情各賦詩觸我故人今昔感

春風吹鬢淚如絲

道人萬念已如霜  
剩有交情老未忘  
今日逢君談舊事  
白頭還哭鄭衡陽

憶昔偕君謁梵筵  
香厨齋罷更流連  
嶽雲湘月渾如昨  
彈指人間十四年

海上煙濤照眼新  
嗟余鬢鬢皓如銀  
滄桑閱世心無住

支許論交老更親

此二語乃前歲與吳雁舟太史在滬上聯句語也

天童坐雨懷陸漁笙太史  
卽次其去秋游山原韻

四首

重陰久無日  
澗水漲如河  
忽報溪橋斷  
誰來策杖過  
正

愁山寂歷更苦雨滂沱白髮哀時叟春懷可奈何  
去歲辱相尋吟秋野寺深幽花然夕照細雨淡疎林喜  
接高人語因聞大雅音清遊如昨日離思悵孤襟  
衡嶽重來此匆匆又五年松杉青似舊鬚鬢白逾前世  
態紛無定禪心亦惘然惟餘蘇玉局文字有深緣  
身閒心自遠詩境老逾佳好踐名山約同持繡佛齋不  
妨參玉版兼可鬥詩脾十里松陰路何時踏翠來

懷陸太史七絕一首次見寄原韻

綠陰涼浸水晶簾白藕花香雨後添料得玉堂清夢醒  
萬山青上兩眉尖

余別黃俊生司馬已三年矣今因嚴筱舫觀察小  
祥來山作詩見示次原韻二首

閱盡浮雲萬變時此心孤月復誰知玲瓏岩下留題處  
猶得重逢與論詩

久滅音塵欲碎琴喜聞白雪動清吟可能留此銷炎熱  
坐受千巘冷翠侵

將徧游吳中山水

萬緣休歇付癡憨山水娛人老尙貪一片閒情何處著  
淡雲微雨過江南

金陵聞安徽恩中丞被刺賦感

忽忽風潮震若雷  
皖江一夕中峰摧  
此真動魄驚心事  
難以人情物理推  
滄海橫流那可蹈  
白雲出岫自堪哀  
眼前荆棘銅駝意  
都向臺城落日來

維揚懷古二首

隋帝南巡玩物華  
錦帆到此欲爲家  
紫泉宮殿今荒草  
莫問瓊花觀裏花

六代興亡付劫塵  
綠楊城郭舊時春  
二分明月依然在  
猶照繁華夢裏人

梅花嶺謁史閣部墓

荒草萋萋掩墓門  
杜鵑啼斷月黃昏  
欲知亡國當年恨



萬樹梅花是淚痕

平山堂懷歐陽公

獨上平山有所思  
公於我法未深知如何一代文章伯  
祇序浮屠祕演詩

贈金山秋崖長老卽題其拈花圖

江山最勝處乃得佳斯人  
寶月或前世德雲應後身微  
拈花共笑一任海生塵語罷  
碧松暮江天月色新

登北固山

長江此門戶第一拱雄關  
江勢欲吞海濤聲直撼山雲  
煙生脚底樓殿倚波間坐覺  
金焦晚城頭踏月還

登焦山絕頂

欲縱江海目攀蘿上翠微水磨天作鏡龍挾雨爲衣北  
固鐘聲近南徐樹色稀焦山北固僅隔一水不過二三里許南徐去此尙十餘里昔人樹色南徐近鐘聲北固遙之句恐未親歷其境特反其意以證其失下方清課罷明月滿  
船歸

登松寥閣懷陶齋尙書

不盡江山勢都歸一覽收潮聲連海濶雲氣壓天秋日  
月波中出乾坤檻外浮永懷庾太尉寂寞倚南樓

重過常州天甯寺愴然有感

毘陵城外古天甯杖策重過涕自零三老共藏多寶塔

青長老及有乾高朗二公  
示寂已久俱塔於磬山

故人惟剩兩晨星

謂如廣道興二師

寒松猶是舊時翠衰鬢都非昔日青垂老江湖還惜別  
可憐天地一浮萍

將歸天童贈陸无悶居士

太白千峰外歸心渡海遙難忘白雲侶如對赤城標淨  
理晚年得神情一悟超高踪何處覓盡日在松寮

閩門懷古

日暮登閩門長歌生古憂夫差愚且愎釋囚忘父仇哀  
哉伍子胥忠誠爲國謀奈何拒不納自刎抉其眸忍見  
越師來寒濤挾怒流峩峩姑蘇臺一炬成荒邱吳國旣

爲沼吳王寧用愁至今頭白烏啼斷吳宮秋

五人墓

卽魏忠賢生祠故址

魏闖竊權日氣燄欲薰天舉國畏其勢五人殊不然青  
山埋俠骨朱戶冷荒烟坏土亦云幸名隨烈士傳

虎邱

闖閭葬骨此佳城霸業銷忘息戰爭獨有雄心猶未泯  
不教寶劍與秦嬴

劍池

闖閭有神劍龍虎不敢窺未能勝句踐持此欲何爲祖  
龍亦大愚取劍留此池丹巖空受鑿長貽山靈悲

生公講臺四字爲李陽冰篆下一石似低頭聽法  
虎邱講臺在說法憶生公頑石頭能點靈根慧自通夕  
陽移塔影寒磬度松風欲汲劍池水恐驚潭底龍

白蓮池爲生公故迹花時清芬遠聞使人彌清塵  
外之思作詩讚之

碧池秋水湛靈根片石生公迹尙存花亦低頭如聽講  
曉風殘月澹無言

眞孃墓與生公講臺對峙下有白蓮池

眞娘古名妓埋玉此山前應聽生公法能空色界緣白  
蓮香自淨翠竹悟皆禪好學散花女殷勤禮覺仙

禮隆禪師塔

傷哉隆祖塔寂寞冷荒煙荆棘行無徑兒孫愧不賢蒼  
苔餘斷碣古木咽寒蟬落日來瞻禮追懷獨愴然

曉登靈巖山

靈巖蘊神秀飛翠冠諸岑落月引孤趣冒煙始一尋奇  
石肖幽鬼古松鳴玉琴門前五湖水浩蕩開余襟

日暮靈巖望太湖

靈巖山上望陡覺太湖寬天背星辰濕濤頭殿閣寒浪  
花翻暮雪雲影壓迴闌我欲挾明月煙中驂白鸞

靈巖咏古四首

館娃宮

一片斜陽裏還憐舊館娃歌塵微度枕宮鬢祇餘鴉宰  
相惟工媚君王不戒奢樵人談往事猶自怨夫差

西施洞

巖下西施洞吳王舊幸頻遠山橫黛碧初月畫眉新水

底香脂滑

香水溪脂粉塘皆西施故迹

舟中伎樂陳

夫差作青龍舟中盛陳伎樂

與西施爲水嬉一從五湖去寂寞苧蘿春

石城

吳王造此城何曾拒越兵徒勞萬夫力媚此一人情惟

剩採香蹟甯聞步屨聲

採香徑響屨廊故迹俱存

山花亦何意猶學

舞衣輕

琴臺

琴臺高突兀翠壓石城陰

琴臺在靈巖絕頂據石城之上

但惜笙歌耳

那知山水音故宮餘蔓草落日滿空林冷浸吳江水浮雲變古今

題鄧尉香雪海

鄧尉知名久我來梅已花空思香雪海洗我舊袈裟樹密蟬聲沸庭陰日影斜終須罷行脚長住白雲家

題鄧尉諾臞和尚一蒲團外萬梅花圖

一箇蒲團外禪心絕點瑕當門五湖水繞屋萬梅花行



苦因持律詩清爲飲茶何時結茅屋相伴老烟霞

與諸道人泛太湖十六韻

萬頃汪洋色遙知是太湖風帆連雨浙形勝控三吳  
島嶼浮空遠波濤湧雪粗四圍天作界一望水平鋪  
巖壑松蘿盛晨昏氣象殊餘霞朝散綺圓月夜跳珠  
白鳥飛難越紅塵到得無衣香菡萏雨心淨水精壺  
眞賞襟初愜良游興不孤况乘禪課暇還與道流俱  
覽古船同繫尋幽杖共扶納涼依細竹充飯煮新菰  
眠伴沙頭鷺趨隨草際鳬物情閒自適舟楫道無拘  
山翠夕逾好溪嵐淡可娛烏篷長七尺容我置團蒲

太湖舟中遣興

一葦五湖客飄然不憶歸天痕青作笠雲氣白爲衣鷗  
鷺如相識煙波共息機夕陽山更好帆逐彩霞飛

題吳牧園太史前溪散牧遺照二首

青簑黃犢舊風流玉帶金魚懶自謀銷受林泉最清福  
晚風涼月意悠悠

玉堂舊夢了無痕片石科頭小照存欲問神游向何處  
一犁春雨杏花村

聽枯木長老彈琴

老禪抱古意爲我撫焦桐如坐石臨澗微聞松語風禪

心冷香雪

師知余好梅特彈梅花三弄

仙梵出花宮曲罷日亭午片

雲生碧空

### 海上重晤陸廉夫

湘上一爲別相思直至今那知黃浦月還照白雲心時  
事嗟無極秋風鬢已侵何當攜手去共上虎邱岑

### 遇蒲作英於滬上寫竹見貽詩以奉酬

與可知名久無由一遇之偶回滄海棹忽見紫芝眉秋  
雨涼吟屐微霜颯鬢絲憐余念鄉國爲寫碧湘姿

丁未六月嚴子均漁山昆仲邀蒲作英葉廣庭及

日本滑川達長尾甲集小長蘆館爲余與陸廉

夫饑別

主人敬愛客英俊盡來臻炎蒸勢方灼坐覺綠陰寒  
圍蔬潔香飯山果湛清尊玄言發妙理涼颺祛煩喧勝遊  
念難再佳會情彌敦明晨悵孤棹白鶴誰爲羣一望海  
山遙青天愁片雲

小長蘆館雅集座中諸子有詩書畫三絕忻然再  
次前韻一首

一室詩書畫浮生有此時荷香涼入袖山色遠橫眉擊  
鉢發孤興吟髭白幾絲君詩如朗月照我碧蘿姿

德堂上座由湘來天童省余作詩見貽次韻答之

老懶渾無着飄然此地游離鄉六見菊話舊十經秋冷  
抱白雲卧橫隨滄海流吾宗得骨髓捨子更誰求

漫興疊前韻

吾道甘寥落蕭然林下游一從泯照用不計有春秋粉  
碎虛空骨平吞巨海流聖凡皆夢幻老矣復何求

四明文晉卿太守將解印寄詩留別次韻以送其  
行

青天好明月惜被片雲封尙覺清輝影猶懸碧澗松金  
風期一振玉魄又重逢終踐名山約探幽意莫慵

喜見陸漁笙太史三令郎戲成一截句奉贈

兒孫繞膝又添丁  
桂蕊蘭蓀香滿庭  
何事相逢成一笑  
老人星有小文星

重陽追輓世伯先廉訪

并序

去年九日前浙東觀察使世伯先廉訪偕幕客  
來太白山登高作詩繪圖見貽且致書江督端  
尚書爲本寺乞唐人經幢藏之奎煥樓今年四  
月卒於皖臬任所重陽對菊感舊傷亡泫然賦  
此

去年九日使君來  
今歲重陽安在哉  
黃菊有情應墮淚  
青山無語自生哀  
蒼茫人事眞難定  
寂寞禪心老益灰

遙望皖江空一哭不知旅櫬可曾回

鄞邑何珊瑚茂才精岐黃術活人無算年七十與  
其孺人今秋同日而卒詩以輓之

名山樂道養幽姿一笑相逢憶往時早識杖鄉還杖國  
不爲良相亦良醫紅顏伴讀人爭羨白首同歸事益奇  
惟有劉樊堪合傳又添仙眷赴瑤池

玉几峰高對結廬經過猶記晚涼初白雲蒼狗看浮世  
紅樹青山讀異書會折梅花勞記我拙集舊名嚮梅吟  
寄嚮梅人句欲歌薤露渺愁余虎溪蓮社都寥落垂老天涯

故舊疎

余住天童六載將滿陸漁笙太史作詩相留爲七絕句一章酬其雅意

六載離湘鬢已斑身如倦鳥苦思還忽傳仙客瑤函至  
留住孤雲不出山

附陸廷獻和作

七十三年髮已斑相逢安肯放君還題詩願乞如來  
佛踪跡長留太白山



八指頭陀詩續集卷七

涂茨衡太守由奉省罷官還湘爲庵男韻詩見懷

次韻奉寄

有序

戊申

憶光緒丙戌六月十五王壬秋先生集諸名士  
開碧湖詩社獨遺王雁峰山長因有詩見嘲云  
長沙近事君知否碧浪湖邊多鯽魚是年十月  
初九郭筠仙侍郎於茲作展重陽會余爲代邀  
雁老赴會而城南杜仲丹熊鶴村各以事不至  
侍郎賦七古一章中有句云王郎妙語誰能識  
碧湖便可名金鯽城南詩老掉頭去釣竿魚尾

不相值又贈熊鶴村云我亦鯽魚甘受餌君如  
鷗鳥獨辭溫明年上巳公與陳伯嚴約余同友  
人修楔湖亭分韻賦詩遂題鯽魚第三集於卷  
端今名士鯽魚半隨物化讀侍郎詩不覺感慨  
係之

紫微山上碧湖庵佳節同游三月三集鯽已曾成妙語  
聽雞且共佐清談喜聞彭澤官休早不戀邯鄲夢正酣  
我爲故人頻禮佛祝君多福更多男

二疊前韻再寄

不將朱戶易茆庵誰識先生所貴三早許雕龍成絕藝

還思捫蝨接新談有才身遁名難晦無酒詩成興亦酣  
還憶老懷應自慰盈階瑞草並宜男

王益吾祭酒近於湘中賦庵男韻詩有却憶天童  
吟伴遠卽論燒指亦奇男之句因有感三疊前

韻奉寄

葵園幽寂似禪庵

公住長沙荷花池園中多葵人以葵園先生稱之

一別雲松

歲兩三滄海浮漚觀世態河汾舊學向誰談不愁對鯉

趨庭缺定卜飛熊入夢酣指日荷花誕靈秀

余曾爲公代謁普陀

大士

一花一葉一童男

報恩經云鹿母夫人見池中蓮花誕五百童男

酬陸漁笙太史四疊前韻

玉堂人老似居庵開徑無心益望三愛看梅花存冷趣  
懶翻貝葉喜僧談烏紗黃綬夢俱遠白首青山酒半酣  
晚歲林泉有餘樂兒孫繞膝又添男

附漁笙陸廷黻見贈次庵男韻詩

我是山陰老學庵送師歸渡碧湘之未容密室常時  
聚且得離筵片刻談鐵可成金言太重謬爲易一二  
字推獎太過  
茶堪當酒興猶酣他時再入天童去儻許皈依作善  
男

五六疊韻奉酬明州太守夏閏枝太史二首卽以

留別

郡齋清冷似僧庵聽鼓趨衙吏兩三莫畏春愁生白髮  
且標神理縱立談平情折獄心猶凜中酒看花興未酣  
難得風流賢太守肯從野衲詠庵男

碧湖湖上有荒庵歸去言尋老友三

謂王益吾祭酒王  
壬秋徵君葉煥彬

吏間逐鯽魚聯雅集共親鷗鳥暢幽談湘清嶽峻詩應  
好柳暗花明春正酣莫笑頭陀無眷屬白雲隨杖即僧  
男

附閨枝夏孫桐和詩寄公屢約遊天童牽於塵  
事未果適示庵男韻詩率和

浙東佳處有茅庵十里松存尙二三望裏雲山不可

卽座中風月每傾談春寒十日晴猶殢梅瘦一枝花  
未酣何異樊中仙翮羨低頭媿煞杜陵男

寄公將遊金陵疊前韻送之

頭白耽詩老一庵狙公閱世笑朝三未蠲文字甯非  
障能歛機鋒却耐談入海孤帆烟浩渺連江春雨意  
沉酣乳鴉流水青谿路儘許投詩弔阿男

贈黃懺庵司馬七疊前韻

甬上詩人黃懺庵夜吟對月影成三白雲天遠安能問  
紅雨樓空不忍談

君亡夫人有紅雨樓詩卷

品竹虛懷心更逸看花

老眼興猶酣痴情代訴慈悲佛早晚還生福慧男

觀音經云

欲求子者便生  
福德智慧之男

附懺庵黃家鼎次韻奉酬寄師贈句

清夢常廻東谷庵

天童東谷庵爲天嶽禪師退居

久慚雅約負重三

前年大作有後會還期三月三之句

離情因結林泉習鼓興還爲風月

談詩寄草堂春意滿書藏石室古香酣他時倘許拋  
家計願共高僧採麝男

再次元韻補賀寄師新得端午帥唐幢

阿育王山永壽庵百梁幢出鼎而三

指鄞縣三唐幢

天童新

得千年物世界應增一美談剝蘚爭看文字古選箋  
拓藉墨花酣永康茅舍乾元樹鎮寺堪稱伯子男

寄呈笠雲本師八疊前韻

麓山飛翠蔭千庵我法羣推不朽三最恥小乘圖自了  
惟將真諦與人談轟雷掣電禪機捷卧虎跳龍筆陣酣  
師機鋒敏捷而書法尤工杯度東瀛動朝野香花爭散女偕男

山中卽事九十疊韻

萬樹梅花繞一庵絕無人問法門三

謂大中小三乘法也

看雲倚

杖聊行樂聚石爲徒祇自談日出飢蜂飛正鬧雪銷凍  
虎睡初酣老來魔佛都無奈山魅何勞幻女男

海水搖天綠入庵滄桑遷變已經三芋香懶衲蒙頭卧  
柯爛仙樵戀手談瘦石幽花禪更寂薄雲微雨意遲酣



山園日涉自成趣笑指雛生是小男

趙仲青二尹次庵男韻贈別言及亡友鄭湛侯明

府及其子叔獻孝廉不勝山陽之感十一疊韻

莫憶衡陽江上庵

仲青曾充衡陽令鄭湛侯書記

鄭虔已死絕亡

亡讀無

三讀君詩好驚奇作嗟我情痴忍痛談游宦人間才未

展修文地下興應酣平生最小偏憐子

湛翁三子叔獻最慧惜早喪無

嗣天喪還傷無一男

贈趙二尹十二疊韻

六年掛錫甬東庵一月相尋至再三每對青山思舊事  
欲傾滄海洗新談片雲隨意生涯冷薄宦耽吟興味酣

莫怪老禪頭雪白見君生女復生男

附漢陽趙潤贈詩二首贈別

飄泊東南老葉庵閑雲野鶴共君三衡湘墮夢從頭

憶

識師於衡陽羅漢寺今十七年

羣紀遺文忍淚談

謂鄭湛老及叔獻孝廉

寥

落知交惟白足別離時節又紅酣青谿游到須回首

蔣妹才華昔勝男

此去鐘山莫結庵歸來應趁節重三長髯似戟驚虬  
叟大局如碁憤史談輸爾天涯行得得愧予塵世夢  
酣酣何當垂釣晴川水供餌還欣有小男

警世二首十三四疊前韻

世界都藏一粟庵佛身無量且言三

謂圓滿報身清淨法身千百億化身

也拈花迦葉微笑杜口維摩默不談聲色叢中呼不

醒公侯枕上夢方酣可憐滿眼痴兒女六賊家家認作

男

萬松青鎖定僧庵降伏貪嗔痴毒三

佛經以貪嗔痴爲三毒

要把

虛空成粉碎始知箇事絕言談木人中酒醉難醒石女  
懷胎春正酣打破重關關楔子男兒到此是真男

### 太白峰望海十五疊韻

太白峰頭望海庵望中何處有山三越人天姥猶眞語  
海客瀛洲總妄談賀監高風今尙在謝公游興昔曾酣

鉅幽鑿險功非淺論賞宜封一等男

明州旅舍書懷十六疊韻

爲客明州旅泊庵

明年古有旅泊庵蓋取楞嚴經旅泊三界示一往還之意

三年已

滿又重三

余住天童已六年矣

也知香火緣前定亦畏風濤海上

談片石孤雲違眾賞千花萬柳戰春酣彌陀慈父應憐

我願作蓮胎最小男

將之金陵舟至吳淞阻霧夢游廬山覺而賦此

我自昨日辭甬東黃浦小歇何匆匆金陵迢遙隔春渚  
乃欲破浪乘長風濃霧蔽江不得渡孤舟兩日仍吳淞  
忽夢淩雲生羽翼步虛疾可追冥鴻鍾山彈指颯已到

故人一笑皆相逢，便携笠屐陟廬嶽。  
五峰秀攬青芙蓉，三峽銀河落天半。  
借此蕩彼塵海胸，虎谿嘯聲猶在耳。  
踏月還聽東林鐘，蓮社高風應未墜。  
吾將老此巢雲松。

二月一日金陵對雪

金陵城頭暮飛雪，重衾一夜冷如鐵。  
曉起登樓一倚欄，在目無塵皓以潔。  
三山一水分瀾漫，白鷺青天同一色。  
烏鴉翻空微弄影，素蛾含輝深匿跡。  
門海玉龍興方酣，嘶風鐵馬愁欲絕。  
三農計日動春耕，六出非時豈云吉。  
老禪憂世畏年荒，詠絮無心苦民疾。

對雪贈梅癡子李二翰林

四山失繁翠高閣遠生寒江城一飛灑天地皓漫漫凍  
鶴飢無語梅花冷自看誰能比孤潔清詠獨憑欄

杭州白衣寺松風和尚哀詞二首

末刼同塵轉願輪那知爲法竟亡身可憐流血開風氣

師是僧中第一人

師以興辦僧學爲頑  
學輩深嫉致慘死

西湖回憶早涼天紅樹青山共放船一別便成千古恨  
春風吹鬢淚潸然

由四明還長沙途中雜感得七絕十首

大海浮杯歲月驚可堪頭上雪千莖多時不返瀟湘棹  
夢覺衡雲繞足生

千里雲帆掛浙東歸心山色兩爭濃  
金焦殘雪壓寒翠疑是卧波雙白龍

夕陽野寺擁晴嵐沿路春光絕好探  
萬頃煙波舟一葉落梅如雪過江南

采石磯邊碧柳垂舟人指點謫仙祠  
祇憐醉月騎鯨去同是人間未醒時

江上迢遙望九華此身便欲伴煙霞

金地藏送童子下九華詩云此去不

須頻下淚老僧相伴有煙霞

自嗟瓶鉢塵中老孤負蓮花大似車

余賞

夢登九華見金池五色蓮花大如車輪

九江飛夢上廬山遙見仙人跨鹿還  
長嘯一聲寒月白

忽驚身在水雲間

百戰山河霸業空我來赤壁哭英雄孫吳差足強人意  
留得周郎一炬紅

一葉東來汗漫游大江淘盡古今愁舉頭却揖青天月  
照我還登黃鶴樓

海上狂龍解聽經三山長在袖中青無端忽起還鄉念  
春水茫茫渡洞庭

青草湖邊浪作花黃陵廟口樹棲鴉禪心老去渾無住  
猶望長沙是我家

長沙小憩仍歸天童感事四首



離鄉忽已老兩鬢雪霜侵春草動歸思孤雲生遠心吟  
辭滄海遠愁入碧湘深太息正蘭地風騷失舊音  
却尋舊行徑亂草沒幽蹊不謂蓮花淨今成濁水泥眞  
燈愁室暗寶筏奈川迷邈矣覺皇遠誰堪化闍提  
孤舟歸遠客獨詠動哀情白足欲何適滄浪空自清却  
憐吾道拙不與世途爭惟有中天月依然永夜明  
又欲浮杯去高棲海上山行將孤笠影歸掩萬松關黃  
鶴不復返白鷗聊自閒何須得丹訣而後棄人間

王益吾祭酒以二絕句題余吳中游草卽次韻書

懷

吟風弄月且消閒說法其如石太頑自笑萬緣休歇盡  
猶餘一髮甬東山

山河大地鏡中痕歲月如流萬馬奔虛擲空門閒甲子

祇依山谷作詩孫

余俗姓黃爲山  
谷老人遠孫

附王祭酒原韻二首

說法觀空未是閒鉢龍泥虎太癡頑何如插脚塵中

去踏徧江南兩岸山

道人佳句雨天痕

自註師憶天台茅庵有袖底白生  
知海色眉端青壓是天痕之句一

時傳誦頃太湖舟中詩天痕青  
作笠雲氣白爲衣亦佳句也閒送雙輪晝夜奔遙

想靈巖最高處俯看萬象盡兒孫

戊申二月由四明還相喜晤編修黃覲與太守勿  
匆又東下蒙贈六絕戲爲拗句次韻奉酬即以  
留別

孤帆渡海烟冥冥湘上蘭橈時一停欲訪騷人問漁父  
呼他明月醉中醒

不戴朝天獬豸冠

公會官御史

夢魂猶自墮長安書名並與

麓山重時見龍蛇蟠筆端

資江之水潔且廉資水之山幽而巖白尤濃煎香勝茗  
黃蘗淡味清如鹽

老年愛靜倦論文中酒看花意却勤白首蒼山自來去

拂衣長嘯芙蓉雲

芙蓉山詎公家不遠劉長卿宿芙蓉山詩日暮蒼山遠即其地

道人學道詎貪名詩草刪除苦又生一曲陽春知寡和  
滄浪聊答棹歌聲

行脚天涯太遽忽垂楊恨不繫飛蓬此後蒼茫雲水隔  
惟憑梅鶴寄書筒

### 附黃編修原韻六首

戊申春半雨中寄禪大師見訪因言前年鄞  
縣陸漁笙學使有詩筴奉寄如達左右宜有  
報章寄師維舟將發率成六絕聊以贈行並

東漁笙學使

風風雨雨晝冥冥難得幽人屐齒停  
世事祇今無可說祇應長醉不須醒

寒山拾得吾湘隽肯讓彌天釋  
道安卓錫名山今欲遍盡收甌越入毫端

無田不退詎非貪長笑東坡律太嚴  
豈料而今須早計莫羞送老祇蠶鹽

身將隱矣又焉文老不成名每勸勤  
多少音書遲作答篋中常擁吉祥雲

浙東詩伯舊知名咳唾隨風珠玉生  
信是曲高人寡和吟髭撚斷不成聲

隴頭昔別太匆匆湘上今歸類轉蓬此去句章逢太  
史煩將小東代詩筒

春山漫興

地勝遺塵事心清妙見聞琴聲微雨潤花韻夕陽熏樹  
樹啼黃鳥峰峰生白雲翻嫌幽賞足欲覓個人分

去夏閒遊吳門蒙陳伯屏中丞贈六絕句携之還  
山遲遲未報今春禪誦之餘謹次原韻奉寄

春風花鳥樂陶陶遙想元龍意氣豪萬頃太湖波浩渺  
青天一月出雲高

文章政事儘堪傳玉局人稱是上僊共喜爲霖能澤物

莫嫌覓句未忘詮

白頭開府已嫌遲肯讓瓊林挺後枝應愛吳中山水勝  
簿書有暇輒哦詩

如毛羣盜漸皆平返旆爭傳父老迎黃犢一犁春雨足  
田歌聲雜凱歌聲

見說探梅鄧尉遊冷香如月淡難收碧紗籠內新詩在  
不羨山門玉帶留

煨芋能嘗個味真清風一拂物皆春他時李泌衡山頂

守護烟霞有替人

南嶽烟霞峯舊有  
李鄴侯讀書堂

附陳中丞原作六首

入社攢眉我媿陶  
浩園人盡虎龍豪

自註余入都時  
師邀王益吾王

王秋徐叔鴻於浩園爲  
余餞別今已八年矣

遠公別後髯如雪  
又見詩篇

尺許高

白梅高詠世爭傳  
有雪無春句欲仙

自註師詠白梅  
詩有意中微有

雪花外欲無春一  
聯爲名流推服

疎影暗香誇絕唱  
較來終是落言

詮

探梅鄧尉已嫌遲  
綠葉成陰子滿枝  
我及早春香雪

海翠禽啼處獨吟詩

金闥名勝數天平  
路轉山椒萬笏迎  
洗鉢泉鳴松籟

歇靈巖遙送塔鈴聲



元墓山高記昔遊太湖一角望中收老僧爲說南巡  
盛到處琳宮聖藻留

兩浙名山愜道眞羨師飛錫五經春擬謀楊子一區

宅也去西湖作主人

自註余將移家杭州擬買徐文定舊宅作廨廬

寄贈葉煥彬吏部三絕句

並序

曩在湘中疊崑崙韻贈易實甫觀察有篋中諫  
草都成血衣上天花不着痕句吏部見之喜曰  
上句切實甫曾上萬言策下句則似僕爲人蓋  
僕少年斷絃至今不續不娶雖花天酒地日事  
遊戲此心寡如此詩可作贈易葉二人實翁聞

之堅持不可曰烈女不嫁二夫佳句可改貽二  
人乎余因以專贈實甫吏部覺頗不直余而余  
每欲詠吏部之爲人苦思不得時閱十年忽於  
海上一夕定起海淨天澄圓月獨朗忻然得三  
絕句爲之寫照

波澄水活湛如鏡樹老心空翠欲飛恰似吾湘葉吏部  
萬花繞座不沾衣

不居朝市不山林別有飄然獨往心魔佛界中難位置  
老僧入定費推尋

雨過微雲淨碧虛一輪皎潔此心如新詩吟就佛應笑

遙寄維摩長者居

春雨既晴坐聽谿聲頗悅禪寂

北澗初過雨東風旋作晴薄雲當戶散新筍負牆生忽  
忽春將暮纖纖月自明茅堂清不寐支枕納谿聲

繆筱珊太史偕其少君子彬及江君詠秋來遊天

童賦詩以贈

高人選勝到長庚五里喬松夾道迎獻翠遙峰微露髻  
催詩好鳥不停聲僧因愛客初沽酒天爲看山不放晴  
應笑老禪耽寂靜未陪吟屐踏雲行

山行

巖戶晝猶扃幽人睡未醒鳥聲穿樹碧石色補天青  
岩瀑濺衣濕谿花吹袂馨誰於看雲處添築小茅亭

贈長庚庵主

五里松陰路長亭復短亭谿花然澗碧林鳥語煙青  
聽梵虎心醉看人佛眼醒山河是何物都向定中冥

谿行既暝投宿山寺花鳥泉石湛然清麗賦詩以

志幽賞

俯視諸人暝山門倚樹端泉聲松徑曲花氣石幢寒  
野鶴巢雲穩鄰雞唱月殘老僧清課罷燒筍供晨餐

暮春示眾一首

春夏之交草木深及時舉眼細參尋若看柳絮休迷雪  
莫摘枇杷便當金

陸漁笙太史約來山作浴佛會至期末赴八月中  
以七古一章見寄次韻奉酬

四月初八最吉日相期共浴黃金佛青山望斷夕陽斜  
良辰難再苦易失去秋不速公自來布襪青鞋何坦率  
今年有約竟不踐得非憚遠而悅尺禪房留掩客生嗔  
曼陀花雨空盈室忽聞雲中鸞鶴鳴驚斷草間之蟋蟀  
調高自古少人和矧茲詞義俱妙密焚香細讀重和南  
勉步清塵破愁疾玉堂人是地行仙大壽已過古稀七

嗟余五十鬢早霜趙州齊年恐未必且學無生悟不死  
不死奚假養生術但願五嶽皆遍游黃犢足健如我膝  
歸來還訪東林舊論交更勝膠投膝休鮑聯吟那足儔  
支許神契或可匹惟惟昨者不赴會有如臨陣先逃脫  
萬松關前虛佇立白佛請究維摩詰

夏日即事

雨過炎威欲受降陰陰夏木影搖窗日斜風定池波淨  
白鳥飛來時一雙

招友人入山

十里松陰路未遙莫辭雲窟老僧招青山却許勞人逸

白髮甯教顯者饒竹裏琴牀經雨潤花間茗碗借雲澆  
休嫌野外盤餐薄苦筍香芹顛顛燒

東坡西湖觀荷花有貪看翠蓋擁紅粧句陸放翁  
翻其意云猶嫌翠蓋紅粧句何況人言似六郎  
語雖妙而墮小乘余於此二句各下轉語

妙淨靈根植已深綺塵雖近未能侵莫嫌翠蓋紅粧麗  
要識渠儂不染心

不礙人言似六郎天然色相那容藏能令佛土隨心淨  
賴汝華嚴吐妙香

贈張子遇觀察二首

時公任甯紹台道

使節臨滄海波濤靜不揚魚龍春睡穩花木夏陰長碧  
沼供垂釣青山對舉觴白頭清興足猶自課蠶桑

衙齋在都市水石亦澄新魚骨矮支座鳥雛低趁人

道署

後園樹密鳥多有魚骨二節大數圍用以支座海山青  
公有領海不駭魚骨大巢林惟恤鳥雛多之句  
在眼池月白隨身何用棄簪笏居官轉絕塵

戊申夏六月易哭庵觀察自羅浮來滬遇於旅舍

邀游天童公獨往靈峰尋葛仙翁遺蹟還禮育  
王塔過鬼谷祠爲長短句行及五律七截若干  
首見示余以住持事繁不能次韻奉和聊題五  
律四章以志名山之幸云



山川靈秀氣都入短長吟明月鑄詩魄白雲生道心千巖泉灑面萬壑翠飛襟我爲茲山幸於今得賞音

意昔大瀉頂迢遙冒雨來徧窮巖壑勝遠帶水雲回得

句花爭雨談禪舌若雷前塵餘影事

余與觀察游瀉山有五絕門影詩百

餘首今裝

成長卷 回首不須哀

湘中別云久海上遇何遲遠自羅浮至同探太白奇稚川勞問訊鬼谷又題詩獨禮育王塔人天俱淚垂

名山遇才子泉石亦生香虎阜前因勝

哭庵爲張夢晉後身龍華

後果芳英雄休自苦詩酒不妨狂他日事明主還應奉

覺皇

月夜舟中與哭庵觀察話舊得四絕句奉贈

躡險探奇老未疲，千巖空翠袖中隨。  
山靈歛黛愁君至，囊括雲霞了不遺。

憶昔瀉山冒雨游，今宵又泛越江舟。  
痴情共祝青天月，還照同游到白頭。

憐君青鬢漸成霜，相見無言祇斷腸。  
淚海已枯情獄碎，人天消息兩茫茫。

山水緣深富貴輕，杖頭五嶽儘逢迎。  
哭庵莫哭宜狂笑，成佛生天定此生。

普陀山次易哭庵觀察原韻二首

四山無路出惟與碧波鄰海是大圓鏡龍爲善女人林  
中紫竹秀世外白華春願乞楊枝水閭浮洗劫塵

麻姑三見海揚塵今我重來三十春波底魚龍仍聽梵  
林間猿鶴尙親人自憐衰鬢非前日却笑浮漚是此身  
誰識南詢參訪意百城烟水渺無垠

煙水渺  
無垠語

華嚴讚有華嚴海  
會童子南詢百城

白蓮臺題壁次哭庵觀察原韻一首

普陀眞佛地海作水晶宮梵聽潮聲裏詩成龍氣中歸  
雲穿樹綠落月浸霞紅欲問圓通理音塵未可空

再次哭庵觀察感懷原韻三首

觀空復何著夢幻此身留減食常施虎浮杯欲度鷗雲  
山雙屐徧世界一毫收我欲抱圓月同乘大願舟

數盡恒沙劫輪迴更幾生塵堆情嶽峻海積淚波成已  
異人天路猶聞哭泣聲吁嗟三界苦向佛早輸誠

吾宗久寥落誰可續傳燈花笑如來佛雲埋入定僧聖  
凡成異轍大小說三乘最上毘盧頂何人踏翠登

登洛迦山次哭庵觀察原韻四首

地靈山色好佛放翠毫光欲入三摩地來乘普渡航黑  
風吹海立白浪打天狂愛看蓮花險高吟過此洋

念彼觀音力波濤了不驚片雲孤笠重大地一漚輕龍

象威原大鯢鯨怒已平我來登覺岸便欲了浮生  
海上洛迦勝開山不計年偶嘗甘露水如到吉祥天忍  
草敷禪座曇花現法筵返聞聞自性妙用不唐捐  
渡海難爲水浮杯更入山蛇王峰露髻龍女翠拖鬟帆  
影來天外鐘聲出樹間夕陽詩正好舟子喚人還

後寺題壁追懷化丈長老

萬國仰慈航蓮花水亦香樓臺含蜃氣日月繞龍光海  
色千重碧金容丈六黃此中無六月坐覺衲衣涼  
環山皆梵剎後寺最幽深法雨留天額松濤宣梵音浮  
空多翠浪佈地盡黃金欲作中興頌南能煥寶林

次哭庵別普陀韻一首

禮別蓮花座蓮花正發花潮頭方聽梵天上又廻槎海  
水皆流淚仙人亦戀家慰君惟學道莫更訪摩伽

贈武當立都觀道士度繼修二首

並序

道士姓庾名繼修未出家時曾截指和藥療父  
病未幾母疾篤或言食子肝可活繼修哭禱神  
前手利刃剜腹出肝割一片長三寸許煎湯食  
母復納餘肝於腹以髮縫創口母既生繼修亦  
無恙設使割肝時稍知有身則不能無我又何  
能無痛也後母死遵遺命與弟繼成於武當立

都觀爲道士不火食恒生啖瓜菜芋菽以自飽  
逢父母忌日七日不飲水而精神不稍衰日行  
百里無倦容武當天柱峰距均州百二十里繼  
修望州城厯厯可數其雉堞近城行人可辦男  
女其目力過人如此初督學使奏其事未報及  
繼修游京師和碩肅親王見之以狀上聞蒙  
賜純孝真人嗚呼如虔道士者亦真可謂真人真  
可謂真孝子矣因爲五言二首讚之

武當虔道士苦行事多奇截指父疴起剜肝母病醫孝  
思通帝座天詔下瑤墀縱得沾恩渥戡身亦可悲

豈獨黃冠者清修世有無忍饑恒絕粒煉藥始開爐放  
鶴三山近衝雲一笠孤丹成或相訪飛劍莫驚吾飛劍乃呂  
仙參黃龍禪師故事見指月錄

### 秋夜書懷

碧虛圓月漸東升獨照蒲龕老病僧甬上青山生白髮  
夢中黃嶽負蒼藤余聞黃山幽峭欲往結茅不果悔因識字多生障悞  
墮狂禪最下乘心印光潛塵海暗殘宵掩淚續傳燈

### 和陳杞懷秋夜一首即次其韻

卧看滄海欲揚塵忍淚悲天更憫人黃土青山骨未冷  
此句實有所指非泛語詞也白雲蒼狗變何頻興亡氣運誰能識文



字知交老漸親石火光中吾與子且留來去自由身

夜起

夜起寒階踏葉行松陰涼月逗微明幽花爭向霜中吐  
佳句偏從枕上成頗覺山居閒有味却憐世態薄無情  
相交惟愛孤雲淡不逐人間作雨晴

戊申六月陪易實甫游普陀各得詩十餘首實甫  
有海是空王淚雲爲織女槎三代以前無貝葉  
六經而外有芙蓉龍來拜佛成童子客到游山  
變女人之句頗自得意而余作無傑出者十月  
十四日由靚城還山於禪寂中因憶前游忽得

七律一首不獨可與實甫抗衡恐古人亦未道  
過實翁見之必首肯曰吃和尚勝我矣

到此彌知佛理深普門日夜演潮音

法華經有觀音普門品乃佛讚大士

三十二應說法隨機之妙蓮爲大士出塵相海是空王度世心今古  
滄桑從變幻魚龍多少任浮沉喜游華藏莊嚴剎吐我  
平生浩蕩襟

甯罷僧教育會成立有以匿名函省垣總會者作  
此奉寄以代解嘲用釋疑謗

天竺天童若弟兄豈容謠啄間深情江河水合歸滄海  
星月光涵混太清浪蕊浮花空自鬧春蘭秋菊亦何爭

白衣大士應含笑兩寺原同一寺名

總分會俱設白衣寺

戊申十月二十四日伏讀

大行皇帝

太皇太后哀詔泣感四章

龍馭升遐祇數時

慈暉寢耀更堪悲內訐外患憂方亟搶地呼天痛莫支

日月雙懸霄漢久山林同沐

聖恩滋

戊戌變法有請毀寺汰僧者聖慈不許其議始寢

翠華邈矣嗟何及草木無情亦淚垂

文宗憂國病橫戈

車駕倉皇幸熱河縞素六軍天慘澹蒼梧雙淚日滂沱終平大亂金甌固重勒中興石鼓謫垂老

鸞輿猶出狩白頭揮淚別宮娥

忽聞

哀詔下神京北望河山涕自橫宵旰勤勞心未已烟塵瀕洞夢還驚豈無膏雨蘇彫瘵儘有瘡痍累聖明泣問昊天胡不弔彌留猶自念蒼生

日月無光氣慘陰空山猿鶴動哀吟敬天法

祖思

堯德掩泣承歡見

舜心

伏聞大行皇帝每得疆臣  
警奏恐慮聖慈秘不以聞悵望前星虛

帝座忻聞

大業

嗣皇音

賢王攝政應強國早慰

先朝聖慮深

贈張讓三六絕句

並序

余耳讓三名垂三十年惜未一見戊申孟冬君  
自西江返棹始得把晤於寒花瘦石間語及故  
人半君師友不禁泣下君笑曰禪寂人亦復多

入世言集卷一  
三  
情我幸識師卅年後不然亦爲汝薤露歌中人  
矣其言雖戲實傷心語也君行將仍赴章門馮  
中丞幕感爲六絕句贈別並訂明春天童之游  
君如不嫌山僧字醜當作倒薤書以代桃符嚇  
鬼但恐倉頡見之而哭曰吃和尚吾不奈汝何  
當退避三舍君以爲然否呵呵

海內才名自昔聞空山寂歷最思君西風落葉滄江晚  
一笑相逢話白雲

甬上重來哭逝波白頭那禁淚滂沱喜君遲見山僧面  
未入山僧薤露歌

詩人海藏鄭蘇龕與君味道是同參不嫌老去風情在  
却怪頭陀痴又貪

蘇龕贈余詩有痴而又貪佛所訴

曲江風誼薄雲鴻笑我名心老未空多少深山閒甲子  
銷磨都在苦吟中

相交太晚別彌難雲際孤帆不忍看一片離懷海天闊  
西江煙月若爲寬

遙指雲峯落照邊明春山荀正當年歸舟應趁清明節  
乘興來參玉版禪

冬月十一夜飯張讓三宅聞故人厲季龍於前數  
日病故明日往弔柩已出矣爲詩輓之

寒月西風颯鬢絲故人云逝不多時四明舊雨交尤早  
一束生芻哭已遲却對寒花思病骨忍歌薤露戲哀詞  
甬江吟伴今寥落白首青松祇淚垂

前年歲杪朱古薇侍郎游天童許題詞相贈遲遲  
未報戊申殘臘余由白門還甬取道姑蘇奉訪  
戲投一絕句以代索逋之役

雲衲衝寒索舊逋殘年風雪過姑蘇梅花一樹朦朧月  
此是詩人避債圖

二月朔國喪期滿遵制剃髮感書一絕已酉

鳳輦龍興俱邈矣猿啼鶴淚恨何如雨宮聖澤留方外



一髮千鈞不忍除

衡山陳仲明余湘社中人別十年矣宣統元年遇  
於甬上以詩投贈感次其韻

湘中昔結文字契甬上今還笠屐親笑我甯非學道者  
與君俱是不聞人白雲出岫終爲雨碧海浮杯遠避塵  
十載茫茫隔煙水無端邂逅亦前因

論道一首次陳杞懷孝廉韻

石爛松枯嬾問年龍眠虎卧各安然固知靜者心多妙  
莫怪山僧語太顛大地平沉猶是妄虛空粉碎未爲禪  
欲參最上眞乘法百尺竿頭進步前

戊申夏溥侗人將軍由京師來游天童一宿卽去  
手書林壑尤美橫額及集五言聯寄贈賦五律  
二章奉酬却寄

如何天上客忽下綵雲間遠渡滄溟水來登太白山不  
知珠履貴却愛衲衣閒一宿匆匆去青松憶妙顏  
華簪心自遠林壑興猶餘閒集古人句親爲老衲書深  
情通尺素千里附雙魚遙問長安訊瓊瑤辱贈余

余在湘時陳述猷屬題虎溪三笑圖遲遲未報閱  
十年矣已酉春仲星悟上人由白門寄書代索  
乃賦五律二章用償宿逋

三賢俱異道一笑各千秋  
緬想虎溪月如從蓮社游  
披圖餘勝蹟題句徧名流  
笑我枯吟久詩成今白頭  
疇昔居湘上每思題此圖  
驚心十年別把筆一言無  
杖錫來江海雲山隔楚吳  
還君詩債緩才鈍莫嗤吾

壽昌寺送郭沅芷明府北上次晃贈原韻二首

古寺翳塵隔疏鐘暮雨沉  
何堪折柳咏還對落花吟  
報國匡時志看雲出岫心  
關河一揮手寂寞綠蘿林  
春草碧如此離懷那可論  
惟持一尊酒聊贈遠人言  
宦海帆爭渡廉泉道自敦  
天涯在庭戶此別莫銷魂

題張讓三小像

此老誰能識  
脩然吏隱間  
看雲心更遠  
籌筆髮先斑  
世事眞成笑  
浮生好自閒  
請觀身外影  
一笑豈君顏

采蘭貽桑鐵珊觀察詩一首

寂寂深林下  
忻忻亦自芳  
惟伊君子德  
佩此蕙蘭香  
采自幽人谷  
來登大雅堂  
清芬懷滿袖  
高咏莫能忘

靈峰解嘲三絕句

耳邊鼠雀紛紛訟  
脚底風濤滾滾翻  
正我那伽方入定  
龍爭虎鬥亦忘喧

捨身飼虎虎方飽  
割肉餵鴈鴈復饑  
卽把靈峰作頭腦  
施他亦是佛慈悲

也知忍辱是波羅世事如雲一笑過我吃十方君十一  
老僧翻爲作檀那

己酉又二月由甬江乘舟至官橋浦過陳岷懷孝  
廉居二首

坐惜春將去幽懷鬱不申遠浮江上棹言訪意中人碧  
海雖難塞白鷗猶可馴所思在林麓應可接清塵  
萬峰青不斷中有異人居水石能清瘦雲霞自卷舒老  
僧來問訊童子罷攤書坐覺江村晚歸舟十里餘

由二六市行至羅江登舟有作

自笑身軀重輿夫不肯肩行將六里路省却一囊錢野

寺鐘初動江村月正圓芒鞋雖踏破猶自意忻然

洪佛齋茂才自慈谿來以詩見贈作此奉酬

之子有宿慧冥心契佛乘遠携溪上月來照定中僧一  
見渾如舊清言得未曾何當紫藤杖共躡白雲層

張讓三自江右新歸枉顧白衣寺喜贈

去冬揮手別忽忽半年餘久看廬山瀑仍還甬水居吏  
情閒更遠豪氣老難除筇杖引涼步尋僧月上初

招張讓三入山銷夏

老僧閒不住極望箇人來高卧雲侵榻遙聽瀑吼雷荷  
香清暑氣松籟引涼杯佇立溪邊路遲君日幾回

已酉六月宮保岑雲階尙書偕高白叔內翰胡濟  
生張子京太守夏香孫直刺秦薇卿大令由普  
陀來游天童奉贈五首

繁星森厯厯片月皎然孤直道甯諧俗明珠豈受污上  
書辭北闕垂釣向西湖欲把蘄王比騎驢也不殊

結伴到天童雲霞爲改容山開水精域海湧金芙蓉且  
坐溪邊石微聞花外鐘自然無暑氣涼透萬株松

一解簪纓累能爲汗漫游三山青入袖五嶽翠盈眸遠  
別雲中鳳閒尋海上鷗可憐憂國淚偏對老僧流

憶昔西巡日中原板蕩時人誰仗忠義公獨起熊羆二

聖迴金輦千官肅玉墀慈顏勞上將喜極淚翻垂  
如何王者佐閒散野雲鄉勲業惟看劍豪情賸舉觴披  
襟談舊事流涕念先皇我久遺塵慮因之意不忘  
冲主求賢急煙蘿暫息機終迴鸞鳳駕莫戀芰荷衣去  
國人皆惜尋僧世已違祇愁丹詔至還與白雲飛

余近喜讀孟東野詩輒不忍釋手憶湘綺翁言余  
祇可鳥瘦不能郊寒心竊愧忤已酉七月登玲  
瓏巖尋廣頭陀覺傾巖峭石古樹幽花俱酷肖  
其詩因戲效一首

一步一迴首細領煙蘿容秋花潤渴壁微雨蘇病松偶



攀瘦藤上忽與枯禪逢綻衣不用布自剪雲片縫

夜登玲瓏巖

老僧好奇險古洞夜深探螺旋佛頭綠螢飛鬼面籃披  
雲踏松影掃月坐蒲龕到此忘炎鬱禪從冷處參

廣律師於玲瓏巖習頭陀行蛇虎狐鬼紛來相試  
一定攝心萬魔拱手因作伽陀二首奉讚卽題  
巖壁用策薰修

一笑諸緣淨千巖片石懸代燈山鬼燄煮茗毒龍涎靈  
境不可住虛空無碍禪百城煙水渺曾踏鐵鞋穿

眞欲外形骸苔生面不揩狂猿從習定瘦虎伴持齋煨

芋延殘息寫經臨爛柴何勞營壽藏長被白雲埋

月下聽爛雲和尚彈琴

老僧夜忽起涼簾颯衣襟俯澗坐危石焚香調素琴  
冷泉繞指皎皎月傳心不悟禪中理焉知絃外音

已酉夏秋大旱四詣龍潭禱雨未獲雨透言念農  
艱慨然成咏

旱魃苦爲虐農夫望眼穿嬾雲常戀岫渴日欲生煙不  
降龍鱗雨可憐龜坼田精誠愧未極咒鉢亦徒然

夜吟

牀底響流泉枯僧夜不眠微聞山鬼語似說野狐禪寶

杖寒敲月銅瓶曉漱煙未能成佛果且自作詩仙

古詩一首效孟郊體

大造極元宥神理曷能言一靈本自虛萬有孰鑄形清  
濁氣雖殊物我皆同春青青澗底松乃是君子魂嚴霜  
殺眾草此獨餘孤芬靄靄山上雲乃是貴人身微風一  
飄颻浮榮卽無存湛湛定中心乃是天地根雨露得其  
潤日月得其溫處幻久不變歷故長若新惟茲信可寶  
餘者安足珍

滬上晤陳伯嚴吏部喜贈

壓潮歌吹沸如湯喜與幽人話夕陽陡覺廬山飛瀑布

還如湘渚泛烟航滄桑歷歷卅年事燈火昏昏一舉觴

六十老僧頭雪白相邀迴憶碧湖傍

君在湘時屢約爲碧湖之會

余以近作效孟郊詩數首錄寄李梅痴併題一詩

於後

戲效孟郊體寄與李梅痴撐腸無別物吃語以療饑瘦  
月黃生魄肥雲冷作肌夜吟燈燄綠窺窻鬼聽詩

次陳吏部見贈元韻

笑君五十不留髭似怕青年背汝馳人裡逃名真避世

詩中門險未忘機誰知袖手看雲客

君有憑欄一片風雲氣來作神州袖

手人不盡攀天蹈海悲目極塵氛無淨土白頭相見賴

談詩

寄金陵楊仁山居士

遙問金陵訊毘耶老作家頻廻梵帝步密取象王牙三  
清辭寶籙五濁度恒沙料得維摩室天人正散花

衡山李志遠少尉寫竹見貽跋語及延陵尙書撫  
湘時登祝融峰往事迴憶前塵渺如夢幻賦四  
絕句志感卽以奉贈

與可胸中有成竹李生筆下無凡姿數枝寫出瀟湘影  
風雨孤吟憶往時

莫將幽怨惱空林省釋淩雲一寸心中有湘妃萬古淚

故山南望蒼梧深

祝融勒石紀延陵漸愧高僧舊日稱文字障深禪定淺  
得人歡喜惹人憎

老不虛心負此君自憐插足混塵氛何當與子歸衡嶽

分占青蘿與白雲

青蘿白雲俱  
南岳峰名

八月初七與陳子言夜坐小花園樹下子言明日

以詩見示次韻答之

傾耳無淨聲舉步無閒踪譬彼一器中啾啾亂鳴蛩大  
道喪已久浮名醉何醺念此樹下游捨子誰能從

夢洞庭

昨夢汲洞庭君山青入瓶倒之煮團月還以浴繁星一  
鶴從受戒羣龍來聽經何人忽吹笛呼我松間醒

夢衡嶽

昨夜夢痕淩紫氛袖中七十二峰青天鷄驚我雲端墜  
芋子煨殘月滿庭

訪魏肖梅學佐話舊有感即送其普陀之行

我每到君家揮童自煮茶微霜葉未脫三徑菊初花感  
舊因流涕乘風欲泛槎衙齋坐疏雨相對憶長沙

鄭蘇龕京卿贈詩次韻奉酬

巍然海藏樓氣壓蛟龍盛眼光皎如月掃盡狂華病笑

八指頭陀言集卷七  
余禪寂人心軟出語硬俯視百家言直等陳羹釘一步  
了不移徧覽區中勝十虛生我心大千感即應根塵併  
銷融頓入圓通聖

再次前韻贈蘇翁

太夷世之雄振海文名盛但偕詔來賢惟工諧競病道  
情冲霞虛險語盤空硬不爲調鼎梅甘作貯槃釘旣無  
黃綬情好攬滄州勝天童隔一海雲谷呼可應我法戒  
雖嚴容子獨傾聖

有客問禪疊韻示之

祛妄心始眞懷奇理逾盛不從驢脚灸翻成馬腹病莫



謂藕絲柔曾伏修羅硬

華嚴經云修羅與帝釋戰修羅敗則偕其眾走入藕絲孔中一時不

見

莫貴天上餉且憺盤中飣莫逞客慧狂當踐實際

勝莫憚見諦難彈指即相應菩提勿外求好證自心聖

結冬示眾二首

叢林以十月十五結冬正月十五日解冬

空山寂歷孰相尋枯木龍吟絕賞音

枯木裡龍吟禪語也

開盡寒

花飛盡葉孤峰迥迥是吾心

涼秋已過又窮冬梢拙煨殘五夜鐘看取紅爐一點雪

凡情聖解盡銷鎔

寒夜獨坐

久坐寒燈黯不明林鐘敲盡更無聲惟餘一樹梅花月

猶照枯禪午夜清

臘月望日於桑鐵珊兵備園中觀梅戲詩一首

兵戟森衛地不聞鳥雀喧寒園草木枯冷芳先返魂深  
紅間淺白點綴雲霞痕高枝貯微月密蕊傾朝暎橫斜  
雖異趣貞靜元同根乃知君子德不以仕隱論纓冕榮  
外觀山海道内存長謠契真賞聊用紀幽言

秋日書示禪者

不是頭陀愛苦吟無邊爽氣集秋林白雲飛作垂天蓋  
黃菊開如佈地金山色醉人元亮酒泉聲落澗伯牙琴  
耳聞目見分明是個事何須向外尋

除夕示眾

一年三百六十日恰似磨牛踏陳迹步步旋轉靡暫停  
歲月催人苦相逼今夕除夕何能除又把新桃換舊符  
迎新送舊紛無已心王翻爲萬法奴本來非新亦非舊  
誰人肯向元初究見色聞香會也麼梅花開徧溪橋路  
元旦示眾二首 庚戌  
大千一氣轉洪鈞枯木開花象外春爆竹一聲翻自笑  
今年人是去年人

元日山家也自忙打鐘隨俗慶年芳  
道人飲屠蘇酒細嚼梅花味冷香

一作冷嚼梅花嗽齒香

由大瀉越仙木嶺經紫氣蕊峰玉屏諸峰小憩芙蓉

精舍徑登雲霧山遙瞰洞庭有作

丙申

去瀉七十里崢嶸四面芙蓉擁化城紫氣遙臨仙木動  
玉屏寒並蕊峰清濛濛空翠晴還溼渺渺湖光遠向明  
直欲振衣臨絕頂天風吹下步虛聲

胡梓芳自金陵寄紙索書舊作戲書一絕句於後  
千里迢迢索我書我書之拙世間無折釵倒薤俱難擬  
意造甯爲倉頡愚

挽毘盧寺印魁和尚

毘盧眞性海何惜一波沉但以人天意而存生滅心能

傳戒定慧已了去來今苦行六年事悽然淚滿襟

正月二十夜登掃葉樓作示星悟禪弟

金陵不到忽三載訪古重踏清涼門蕭梁往事如敗葉  
登樓欲掃俱無痕道人觀世猶浮雲古今變幻何紛紛  
願放心光照沙界彈指破盡無明昏寶誌不作達摩死  
西來大意誰復言與子且卧松下石笑看落月翻金盆  
大千一髮了無着區區成敗何足論

題陳伯雨孝廉所藏文待詔荒山流泉圖

山荒荒兮無人水潺潺兮有聲雲濛濛兮欲雨若有人  
兮自語切浮雲兮爲冠裁瀑布兮爲裳憫舉世兮炎熱

緊獨余兮清涼披圖兮一笑覺山高兮水長

夏彞恂觀察以贈沈桂芬詩索和遲遲未報噴有

煩言作此解之

先生結習在狂痴迫我同爲綺語詩莫怪白雲耽冷靜  
懶隨丹鳳比威儀散花天女顏如玉卧病維摩鬢已絲  
名士美人幽怨意云何却遣老僧知

贈樊雲門方伯四絕句

雲門方伯人中仙百首紅梅海內傳我愧白梅纔十首  
吟髭撚斷不成篇

洞壑高寒是我家閉門獨自咏梅花淡煙殘月橫斜熊

爭敵羅浮萬樹霞

白梅和尚出山村來上紅梅布政言

李梅庵提學囑余謁公云白梅和尚

不可不見

桃李紛紛亂春色暗香疏影欲銷魂

毘盧寺爲楚人

出資建造近爲溫台僧所佔

孤山門戶冷難支全仗逋仙與護持一樣冰心顏色異  
春風同是最高枝

題夏琴甫琴好圖次見贈原韻二首

抱將綠綺遠尋僧萬壑松濤快未曾當暑聽君彈一曲  
清於赤腳踏層冰

寥寥寒夜定中僧一點琴心動不曾四座無言山月白

微聞飢鶴啄池冰

金陵重贈成子晉大令

石頭城上看秋潮一別音塵久寂寥  
今日重逢俱老矣春風兩鬢雪飄蕭

劉侯俠骨已成灰

昔年於劉康侯觀察宅與君相識

回首人間萬事哀

訪舊江南聽春雨青山冷抱白雲來

毘盧寺贈諦閑法師

猗歟法師僧中雄教觀恆演天台宗  
渡濤海口翻遙空遠從雁蕩來江東  
義龍律虎紛相從大擊法鼓聲逢逢  
扶起佛日懸天中振聾啟瞶開羣蒙  
祇園萬木何青葱



靈山一會猶未終我今衰老難鞠躬聊作偈頌揚真風  
永資覺道於無窮

贈李心荷太守

感公意不淺我弟在時貧柴米頻分贈饑寒轉與親妻  
亡還助葬女弱又施仁出世難酬德惟將淚灑巾

寄酬譚澹園先生

并序

譚澹園先生旅寓蕪湖因游開元寺見拙集謬  
蒙推許於去年七月致余書云閑其性安其情  
以山水自娛者柳柳州有深取焉而不以湘綺  
翁比賈島爲然且次余山居原韻四首索和余

住持事繁遲遲未覆今夏四月禪課之餘乃次  
韻奉酬

地僻離塵遠身貧與道宜物情閒易見世態幻難窺雲  
約月潛遁花謀蝶共移斯人扶大雅猶自愛余詩  
聊娛山水趣敢與柳州論却笑騎驢客行吟出寺門祇  
緣詩骨瘦翻失道情溫有意逢京兆推敲安足言  
世味嚼如蠟禪心冷欲冰每攜松頂月閒倚澗邊藤獨  
鶴誰爲侶孤雲應可憎惟憐彭澤宰曾訪雁門僧  
聞道開元寺禪扉背水扃欲將雙鬢白來話一燈青月  
照松間石風搖塔上鈴相逢定何日吟望入蒼冥

四月十三日桑鐵珊兵備偕一友一僕輕裝入太

白山賦詩四章奉贈

果踐名山約因知吏隱清輕裝乘夜發微月引幽行不  
遣樵人識休嫌野衲迎暫拋黃綬事閒話綠蘿情

千巖高礙日四月冷於秋應趁簿書暇能携好客游倚  
松聊看鶴入谷不鳴騶一飯飽禪悅齋鐘出寺樓

四明眞佛地列聖有奎章玉帝猶尊道金精尙吐芒

西晉

永康年中義興禪師初誅茅於此有童子供給薪水久  
而辭去曰我太白星上帝感師道行遣侍左右言訖不  
見太白山微言得淨理小憩卧禪床試誦荆公句幽花

名始此

度水香

王荆公過天童溪有溪深樹密無尋處惟有幽花度水香之句

穿林禮壞塔掃葉讀殘碑

宋宏智禪師塔在東谷師隲州人遂稱隲州古佛諡號宏

智塔曰妙光龍閣周葵撰塔銘狀元張孝祥書碑

笑破枯禪面歡生古佛眉送

歸雲欲暝悵別鳥含悲何日青蓮宇仍尋白社期

丁象明明府陪觀察使桑公入山和余夜吟詩一

首見贈疊韻奉答

長怪竹根泉泠泠醒冷眠却陪滄海使來打白雲禪意  
蕊愁生葉心香懶篆煙自甘成獨覺不願領羣仙

山居遣興

自愛幽居道味深禪餘聊復動清吟白雲抱石有遠意  
明月在天無高心稚笋眼看頻解籜離松手種欲成陰

閒中不覺吾身老坐卧青山白髮侵

五月朔冒雨尋張蹇翁夜話有作

月黑雨傾盆牽衣夜打門欲將吃禿意來與蹇翁論水  
月定中影山河夢裏痕一燈寒自照了了更何言

疊韻奉酬鼎湖秋澄上人寄贈四首

遙聞耽寂定亦復事枯吟安得抱明月相尋愜素心微  
風動修竹涼思入幽襟偶誦碧雲句如聞清梵音

曹溪在何處欲禮祖師來古路愁多梗迷津喚不回爭  
提嶺頭物誰震頂門雷言念法源竭觀空亦自哀

像法久云滅我生何太遲二三人已邈

西天四七東土  
二三乃傳衣諸

祖之百六數何奇未證菩提果空題貝葉詩白頭無寸  
總稱  
補寂寞淚雙垂

遙望南華哭

六祖道場在南華山

憑師熟辦香一花開已落五葉

願重芳碧浪浮天闊黑風打海狂終期鼎湖上來與話  
軒皇

答夏公子二絕句

并序

余有白梅詩十首樊樊山方伯有紅梅二十四  
首今夏伏雛又有綠梅三十首有紅梅布政白  
梅和尚綠梅公子之稱伏雛復以七古一章見  
寄蓋欲以公子之艷情爭和尚之冷趣也戲作

二絕句答之

公子前身綠萼華  
樊山應是赤城霞  
老僧自抱冰霜質  
碧霧朱塵沒一些

紅梅太艷綠梅嬌  
鬥韻爭妍寄興遙  
應笑白梅甘冷淡  
獨吟微月向溪橋

陳天嬰以題龔定庵詞二首見寄次韻答之

定庵定慧幾生修  
悞把名花鑄綺愁  
欲向老禪來問法  
一拳打碎骷髏頭

百萬阿僧祇一朝  
情生智隔便迢迢  
人天無限傷心事  
乞取牟尼照自銷

寄天嬰子

天嬰亦是可憐人  
大海風濤集一身  
正眼觀來成一笑  
微雲那掩太虛眞

普悟自南嶽祝融峰從余剌染將二十年力學不  
倦近因患心痛之瘧就醫歿於旅舍余往封龕  
余呼其法名血淚交迸爲二詩哭之

嗚呼汝竟死使我老而孤問法言猶在觀空淚不枯人  
皆稱子德天忍喪吾徒身外復何有心中尙痛無  
師徒緣假合骨月性情同聞我呼其字雙眸淚卽紅浮  
生元自幻至慟亦難終殞涕哀前事迢遙憶祝融



八指頭陀詩續集卷七終